

四庫全書

集部

欽定四庫全書

集部
文忠集卷一百一

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣沈立銘

謄錄監生_臣杜文海

欽定四庫全書

文忠集卷一百

掖垣類藁七

宋 周必大 撰

乾道八年正月任禮部侍郎再兼權中書舍人

右朝奉郎權尚書刑部侍郎兼詳定一司勅令

王柎除集英殿修撰知饒州見任人別與差

遣 乾道七年十月十三日指揮

勅自楚東告饑朕數下省賦移粟之令念非臨遣見大

夫無以布宣德意會予司寇力上均勞之請因能而任
朕得之矣具官某雋明通達忠信慈惠久居是邦又嘗
以使者節臨之上下相安為治易耳茲用加爾以書殿
之華職佩爾以二千石之印綬既從所欲亦乂我民夫
周之荒政漢之循吏布在方冊相本有末尊爾所聞行
爾所便千里之間吏畏而人愛流徙者歸困而窮者給
賜無負於素學尚勉之哉可

左朝散郎湖南提刑陳從古除湖南運判

十二月十二

十五日

指揮

勅具官某去歲湘部有豐有歛朕以夙宵軫念惟懼一夫之不獲布宣惠澤不在良使者乎爾家世文儒才猷峻茂選繇郡最擢按祥刑肇塞車帷亟易漕節事權加重能勿誨乎夫養民莫如德理財莫如義裒多益寡天之道也平徭簡賦朕之心也毋匿斯指益圖爾庸可

右朝散郎直秘閣前江西提刑陶定除荆湖南

路提點刑獄公事

十二月二十五日

勅具官某前有司謂爾兵侵官收其使節惟一青難於
掩德觀過足以知仁古今之通誼也茲庸起爾按刑於
湖湘寧不謂爾廉介公勤臨事弗苟故見思歎爾其往
哉正身乃能正人聽訟不若無訟敷我德意用康遠民
可

戶部郎官湖廣總領呂游問除直顯謨閣知襄
陽府填見闕所委點檢閱軍器不得滅裂候
事畢李安國到日方得前去之任任滿前來

奏事

十一月二十一日

勅具官某襄為古郡今號邊藩有兵有民寔藉綏撫久
矣擇帥庶其在茲爾食德相門宣勞膺仕材猷之美中
外具宜寓直貽謨徃膺閭寄昔之良守多矣而羊祜之
名獨傳蓋綏懷得江漢之心墾田致十年之積與我共
理不當如是乎勉悉乃心毋曰前人之不可及可

戶部郎中李安國除大府少卿湖廣總領不候

授告疾速朝辭訖起發前去

十一月二十一日

勅具官某國家養兵百萬雲布於江淮荆蜀之間置治
粟使者四擇列寺介鄉若尚書郎畀之其在武昌者總
六道八十郡之賦任隆事夥申於三方以爾有肅給疏
通之才濟愛人利物之心是以明而不苛辨而不擾列
屬版部有華厥聲擢佐司府徃督餉道外計之重殆無
復加夫衛民者兵也贍兵者民也用不可以不足力不
可以不裕二者兼濟則予汝嘉可

直秘閣知盱眙軍龔塗職事修舉可除直徽猷

閣十一月二十一日

勅具官某國家間暇守邊城者雖微扞禦之勞然久於其官使斯民按堵撫字無曠是亦能矣外華內閣寵以璽書母替厥勤益觀來效可

右承事郎直秘閣權發遣徽州趙師夔起乾道

七年以上供絹八萬一千七百六十餘疋每疋

重十一兩以上戶部保明推賞特轉一官

正月

二十二日

勅具官某古者帛精麤不中數幅廣狹不中度不弼於市況可共公上乎爾才裕為州首蠲宿弊貢篚應有司之式蠶桑無徒費之工計臣以聞朕甚嘉之進官一列

使奉公享上者勸焉可

紹興十八年五月十四日朝旨
徽州之將上供絹依祖宗舊制

作十兩為足輸納戶
部勘當依本州所申

軍器少監兼權度支郎官單夔差知湖州填見

闕 正月三日

勅具官某方地千里付之守臣條教若否人情之休戚

繫焉况吳興古號名邦今為近輔丈二之組朕不輕畀爾以才諳自昭于時選繇周行徃治茲土為政有要吾其語汝率屬欲正撫民欲寬涖事欲勤御史欲嚴能是四者斯良牧矣可

左廸功即太學錄梁汝永再任

正月二十七日

勅具官某爾以經術起家見謂醇茂成均列屬三載于茲士既汝安予則因任夫賢士之所關風化之所由非特攷其藝能稽其中失而已學者必以規矩尚有助哉

可

敷文閣直學士右大中大夫提舉江州太平興

國宮方滋差知紹興府

勅會稽北枕浙河左界滄海生齒富庶貢輸浩繁東南
莫京有自來矣巡守吳會又為輔藩如周洛師如漢馮
翊謀帥加重異乎它邦具官某敦厚閎達惠和通敏名
字典郡越三十年官閩廣江湖五為方伯踐歷休顯疇
出其右是用命汝尹茲東郊假斧鉞釐組綬於庠念哉

提封七州人則胥倣爾撫民孰敢不仁爾訓兵孰敢不精勉圖治功毋使嚴助之問久不聞也可

左從事郎充詳定一司勅令所刪定官祝櫟劄

子來年正月十五日合該磨勘乞依惠利民

冷世修例改次等宣義郎將宣教郎一官回

封父即溫

十二月二十三日聖旨將依所乞

勅某人爾之良子有譽于朝顧貶一官為義方之報雖微前事猶不難於出令况援比可從者乎祇服命書益

綏後福可

龍圖閣直學士左朝奉大夫提舉江州太平興

國宮周操除太子詹事

三月十一日

勅東宮設官雖衆而師傅賓客常虛位不置惟端尹為
之長職間無事異時率以近臣兼之今吾子好賢重士
允迪三善何惜備官助其進德哉具官某履道醇固持
論英亮拾遺執憲風采凜然典銓治民聲寔交著俾踐
厥次莫如汝宜夫不勞爾以有司之事將專責爾以輔

翼之實溫文恭敬固曰夙成正事正言亦由日告茲惟
遴選可不懋哉可

權工部侍郎兼臨安少尹沈復除權戶部侍郎

正月十一日

勅舜命司徒在親百姓禹稱善政惟叙九功眷時敷教
之官寔任養民之寄孰明古誼我有通儒具官某早以
文鳴中絲材奮善處劇煩之際靡形聲色之間比貳冬
卿參釐天府嘉乃政聲之邵知其心計之優移佐劇曹

益高邇列朕方力修政事躬率儉勤念版圖之入有常而軍國之須無藝必欲兼濟莫如得人爾其權錢幣之重輕究貨財之本末毋乏吾事毋傾利源俾予既庶之人馴致無疆之說可

權戶部侍郎姚憲除權工部侍郎兼臨安少尹

正月一日

勅列事官於禁路均曰邇聯助尹正於儲闈難乎上介即貳卿之已試考三輔之前庸豈必他求是加因任具

官某性資勤愼術畧通明轍環畿甸而治最有聞職總
貨財而利源無壅肆頒疊組改畀兼官今土木不興戈
矛已勵若時起部允謂清曹惟予駐蹕之邦昔汝撥煩
之地自元良之涖止舉庶俗以晏如桁楊之繫既空廩
庾之儲寢積爾其奉承教令革異時一切之規宣布中
和示他日四方之則任吾之責繫乃之功可

權吏部右侍郎張津落權字

正月四日

勅古之銓選任人後之銓選任法雖然為之貳者能悉

其聰明行以公正使窒者通枉者伸視古人其庶幾乎
朕方責成厥有申命具官某祥符樞臣之華胄宣和學
校之諸生閱今昔之理衆矣更郡國之事多矣典領右
選固宜優為茲疇爾庸就正厥序凡按格而與校年而
遷成規具存朕復何訓若夫人才之傑異績效之彰聞
時為朕言之罔俾智愚同滯能否無別以歸咎於吾法
古之道也汝尚勉旃可

直秘閣知安豐軍張士元職事修舉特轉一官

令再任

十二月三日

勅具官某六蓼舊墟控臨淮水蓋今之北鄙而汝之故鄉也為貳為守于茲八年固圉撫民勤則多矣進階加職榮亦甚焉因任爾能載增厥秩益圖治效以慰邊氓之心可

觀文殿學士左通議大夫提舉臨安府洞霄宮

汪澈特與轉一官致仕

十月三日

勅祖宗以來一命之士凡致為臣必增秩寵綏之所以

旌止足全始終也矧予舊弼引疾告歸禮之所加滋不
可緩具官某高明寬厚莊重簡廉本之以沉識輔之以
篤學踐更二府休顯有聲久安燕閒何遽請老雖頒詔
諭莫得而留夫繇布衣以經術起家得時行道致位樞
輔安居就第身名俱榮如古之卿大夫者斯亦鮮矣其
進階一等示朕念舊優賢之意焉可

江澈特贈左金紫光祿大夫

十月三日

勅得謝垂車猶思禮貌之敬告終易簣何意股肱之虧

綏以愍章紆予震悼故具官某履業端厚謀謨靖深名
高肅政之時勲著護軍之日受知太上燮元化於辰階
被遇冲人運前籌於宿府雖衮衣之浸遠亦符竹之屢
分二疎知足之風甫從爾志一老不遺之嘆遽惻我心
誕頒書命之華超陟文階之峻噫鄭元寢疾居有已辰
之嗟知悼在堂固無子卯之樂尚歆徽數永耀泉扃可

武德大夫充四川宣撫司提振諸綱進馬王世

雄部轄本司攢積到堪好西馬五百匹赴御

前交納了當轉一官支牒設錢三百貫十二

月十五日

勅具官某馬徠蜀漢道阻且躋汝總效牽其群孔阜厚
加賜予優進官聯旣旌厥勞亦勸來者可

右朝奉郎陳唐弼主管官告院虞似良並除大

理寺丞主管右治獄

正月十六日

勅具官陳唐弼等唐虞之時畫衣冠而民不犯然猶有
欽恤之戒況於後世何敬非刑爾唐弼彊明不私爾似

良修潔自好或賜對便坐或拔尤周行並丞士師時乃
簡擢惟良折獄尚忱念哉可依前件

直敷文閣福建運判呂企中除福建路提點刑

獄公事填趙子英召赴行在闕候任滿前來

奏事

正月二十五日

勅具官某七閩地狹人衆為生甚艱故其民亦重犯法
然東際海南接炎嶠西入贛境風潮出沒之姦山谷走
集之盜控御失所或害吾治按刑之任非人可乎爾才

具愆閔不隕世美茲繇漕輓就寄平反即舊部則吏士相安假繡斧則使華增重徃因其俗體我好生可

右朝散郎陳峴除福建路轉運判官填見闕正

月二十五日

勅具官某書曰敷奏以言明試以功虞舜之治顧不出此乎今閩部鹽筴浸壞公私病之汝來自卿邦列上八弊有味乎其言也何愛一節不試汝功雖然言弊易採弊難朕方懲誕謾之風求利民之寔言底可績何吝陟

明日奏罔功寧容佚罰汝大臣子號稱通才毋濫厥官
以若台訓可

左朝請大夫前知復州張璠差知常德府知萬
州趙公廩差知利州幹辦行在諸軍糧料院

王璠差知德慶府

正月二十七日

勅具官張璠等武陵地控五溪益川為蜀北境晉康介
居嶺表皆吾名鎮何擇非人爾璠沉厚疏通奏三年之
課爾公廩靖共豈弟得十里之心爾璠詳練敏明洽中

朝之譽或遷或擢並付左符咨爾三臣其聽朕命惟公
可以率下惟惠可以使人罔曰民愚而有善則誠服罔
曰郡遠朕無隱而不知各懋乃庸以須明涉可依前件

中書後省召試閣門舍人策問一首

正月二十
六日燕炳

問在昔漢氏開基於高祖而中興於孝宣其事業蓋可
攷矣懷王諸老將曰沛公素寬大長者高起王陵曰陛
下使人攻城略地所降者因以與之與天下同利也及
考本紀則不然項伯可罪而爵之丁公可貸而戮之封

所愛而誅仇怨微張良之言亦殆矣其攻陳豨在十年九月而從入蜀漢伐楚之賞未徧行也所謂寬大長者能與天下同利固如是乎孝宣之治在於信賞必罰綜核名寔然膠東流民自占者八萬餘口此豈難見王成乃冒其賞願代京兆者數萬人其政可知廣漢乃竟戮焉越職踰法以取名譽則有元康之詔務為欺謾以避其課又在二十五年之後當是之時賞罰名寔亦少戾矣豈抑揚遲速固自有意歟將設施次第或不可盡紀

歟不然何史氏之牴牾也共惟聖主方以堯舜三代為法固無取於漢事然日奉軒陛當思脩清問之及試為言之

繳曹耜詞頭奏狀

具位臣周某準中書省吏房送到詞狀一道二月一日三省同奉聖旨曹耜除臨安府推官不候授告日下供職令臣命詞須奏聞者右臣仰惟陛下稽用祖宗舊制命皇太子領尹臨安置府推三人峻其資任外視郡守

內亞郎省蓋將重行都廣衛翼也自馬希言為郎之後
虛次頗久謂且高選才行兼邵之人使充是選忽除曹
耜人不謂宜蓋耜貴游子弟未閑民事素無望碩驟預
浩穰之政瘝曠必矣願詔三省別擇俊僚庶幾協贊元
良布宣上德所有詞命臣未敢行謹錄奏聞伏候勅旨
尋有旨耜知嚴州

辭兼中書舍人劄子

左朝散郎權尚書禮部侍郎兼權直學士院兼同修國

史兼寔錄院同修撰兼侍講兼權中書舍人臣周某劄
子奏臣昨奉聖旨以趙雄同知貢舉差臣攝行西掖文
書臣以時暫不敢辭避近者趙雄丁憂復令臣依舊兼
權緣臣兼職已多才不能給決致瘵曠仰累聖知今林
機送伴來歸韓元吉已嘗攝事欲望聖慈免臣兼權取
進止二月三日三省同奉聖旨依

明日有旨林機韓元吉依舊權中書舍人

文忠集卷一百

欽定四庫全書

文忠集卷一百一

玉堂類藁一

宋 周必大 撰

上德壽宮尊號表牋冊文

乾道六年

皇帝請加上太上皇后尊號第一牋

十一月十三日表文

直院鄭
聞撰

臣御名言伏為郊祀大禮慶成謹帥羣臣詣德壽宮恭請

加上壽聖太上皇后尊號者伏以國之大事已肅展於

親祠家有嚴君當並伸於美報爰鋪張於懿範冀增衍

於徽稱

御名

中謝恭惟壽聖太上皇后殿下摯仲興周塗

山翼夏夙播嬪京之詠助成與子之謀肆是菲涼三修

禋祀假於祖廟寧神本自於寧親陟彼郊邱事地蓋資

於事母荷天心之響答賜帝祉以駢臻亦既受釐敢忘

歸福是用闡繹寶慈之誼形容遡日之明載頌閭彞益

隆孝治恭請加上尊號曰壽聖明慈太上皇后伏望俯

昭誠格勉抑謙冲對景貺於二儀洽歡心於四表尊曰
太上明儼極以無窮至哉坤元壽配乾而有永謹奉牋

陳請以聞臣

御名誠惶誠懼

闕

闕

視敝屣於

寰中共仰有虞之聖遺元珠於水際孰明黃帝之心猥
以冲人紹於大寶每親承於訓誠思祇竭於嚴恭比奉
國常洊修郊類景霽於假廟之夕星明於升壇之初匪
涼德之致然繫聖暮而底此用披丹悃請益鴻名蓋上
合於天心下符於民願竊窺周誥尚守堯辭惟君親之

美未昭豈臣子之心可已伏望下允俞之令安延企之情
如此則帝命式於九圍靡遠昭假德教加於百姓獲盡
愛欽得請是期輸誠深切謹再奉表陳請以聞

德壽宮答

皇帝請加上尊號第二表牋允誥

再覽來章具孚至意惟雲陽奉玉本躬致於精禋則宣
室受釐尚何嫌於專鄉乃侈乾坤之況用為父母之先
顧方自樂於冲虛茲用力辭於稱謂而勞頓警蹕勤勤

搢紳必欲加巍巍蕩蕩之名蓋將致尊尊親親之誼實
我家之盛典度載籍之前聞使綿區形孝治之風而信
史紀聖人之行勉抑執謙之志良深溢美之慚

淳熙二年

皇帝帥羣臣請德壽宮恭請加上壽聖明慈太

上皇后尊號第一牋

閏九月七日表
文內翰王淮撰

臣御名伏為光堯壽聖憲天體道太上皇帝聖壽無疆來

年七十謹帥羣臣詣德壽宮恭請加上壽聖明慈太上

皇后尊號者君尊如天既壽名之兩得坤稱乎母宜位

號之俱崇雖云臣子之至情時乃華夷之通願臣

御名誠

惶誠懼頓首頓首臣若稽治古欣慕隆周惟太妣徽音

御家邦而有法則文王美化行江漢以無邪此思齊所

以形大雅之篇而漢廣所以播二南之詠何幸我家之

親見增光往籍之攸聞恭惟壽聖明慈太上皇后殿下

道備河洲祥開渭涘贊仁壽躋民之化同聖神運德之

休遡日為明孰非臨照寶慈與儉庸格和平茲為冠古

以超今何但由中而及外萬有千歲適觀閭範之彌新
三十六宮咸謂號榮之未稱方上帝眷無疆之厯肆嚴
君延有永之年將丕闡於高明盍並隆於持載且漢之
未央長樂豈常同奉於玉卮如唐之永正元和曾不對
陳於寶冊孰若具非常之慶是宜增甚盛之稱齊聖廣
淵彰成湯之內助熾昌耆艾應壽母之嘉名臣不勝大
願恭請加上尊號曰壽聖齊明廣慈太上皇后伏望特
屈謙光勉從衆志居域中而大者四庶兼形高厚之功

王天下而樂者三冀長奉庭闈之養謹奉牋陳請以聞
臣誠惶誠懼頓首頓首謹言

皇帝帥羣臣詣德壽宮恭請加上光堯壽聖憲

天體道太上皇帝尊號第二表

閏九月十七日

臣

御名

言近帥羣臣上表恭請加上尊號曰光堯壽聖憲

天體道性仁誠德經武緯文太上皇帝伏奉答誥未賜
俞允者修千二百歲而為皇時甫周於七帙觀五三六
而建號慶允屬於雙親事冠古今喜均家國謂俞音之

亟下何謙柄之猶持率籲羣心渚干睿聽臣

御名

誠惶誠

懼頓首頓首臣聞仁由乎性斯能博施以無為德本乎
誠乃可健行而不息經武故一怒而安天下緯文故七
旬而格有苗偉哉四事之兼展矣百王之冠飛英聲而
騰茂實當陳漢家掌故之儀因壽厯而播鴻名更邁唐
帝應乾之冊恭惟光堯壽聖憲天體道太上皇帝陛下
心潛溥博身濟艱難方垂衣而視天民乃褰裳而陋神
器享國獲寅恭之報延年昭安樂之功春秋何止於八

千甲子正踰於四百視陶唐異位之載固可萬斯小周
室卜年之期徒能十此允謂生民之未有豈特古來之
所稀匪衍徽稱孰彰榮遇非不知功成弗處道廣難名
縱益千言於崇尊乎何有矧加八字在揚厲以尤踈然
而神天之佑不可虛華夏之心不可遏伏望沛然出令
許以涓休設黃麾於大庭鏤白玉之新牒上德不德以
有德祈勉副於輿情大書特書不一書將繼脩於慶禮
謹再奉表陳請以聞臣

御名

誠惶誠恐頓首頓首謹言

德壽宮答

皇帝請加尊號第二表允誥

封章狎至欽愛交隆粵紹興內禪之初已肇稱於盛禮
暨乾道躬郊之後復申講於慶儀幸天畀於壽康獲日
安於榮養俾耆而艾受祉既多若聖與仁則吾豈敢乃
輯廷紳之議洊勤法駕之臨喜父母之年可知觀天人
之際允答謂方衍無窮之筭顧難辭甚盛之名雖益美
多兩喜之言義當固避然榮懷尚一人之慶理實相因

其順衆心以光孝治

皇帝加上壽聖太上皇后玉冊文

維乾道七年歲次辛卯正月丙子朔皇帝臣

御名謹稽首

再拜言曰臣聞君子三樂以父母為先而王天下不與
焉伊上古以降歷選乎列辟篤於事親虞德以盛勤於
問安周歷斯過然則重華協帝饗國永年成比屋之封
基二南之化又何以加於孝乎豈不力鮮而功隆治邇
而效遠哉臣以眇末之質夙奉溫清撫育教誨底於有

成實惟我父慈母愛之恩自陟帝位於今九載勤於邦
無盤游之暇儉於家遵澣濯之志王政興焉德教刑焉
亦惟父慈母愛之功也屬者候景初至載秩元祀奉裸
圭而先祖聽奠瑄玉而神示格繁釐浹於縉綬大賚徧
於華夏穰穰熙熙臣何力哉揆厥所元亦惟父慈母愛
之德也夫天地裕於萬物萬物無裕於天地况我壽聖
太上皇后避功於十亂得道於少廣冲虛澹泊從黃帝
於大庭之館明識慈範豈昧陋所能稱替乎然而三神

之歡不可忽也臣妾之望不可缺也今鴻名顯號加於堯父則我聖母曷可後已是用章明具慶率籲衆心懽懽惓惓不勝大願謹奉玉冊金寶上尊號曰壽聖明慈太上皇后伏惟殿下含章而亨得一而寧誕受帝祉永膺令名舒太陰之華婉放勲之明躬老氏之慈對如天之福億萬斯年保我子孫臣御名誠懽誠忭稽首再拜謹言

太上皇后生辰功德表疏

乾道七年

皇帝進奉壽聖明慈太上皇后生辰功德疏八

月二十一日

右伏以氣清西顙上應太陰之精瑞啟東朝下符八月
之筭延祝方增之壽亶惟最妙之緣壽聖明慈太上皇后
伏願博厚順乾輝光遡日鍊女媧之石功常補於皇天
熟金母之桃宴屢觀於閼苑臣無任懽禱之至謹進

賀表

臣御名言伏以八十年而符貴女之興久儲祥於魏巖萬

千歲而歌壽母之頌彌衍慶於魯邦夢月應期溥天胥

悅臣

御名

誠懽誠忭頓首頓首恭惟壽聖明慈太上皇后

殿下躬行清淨性守謙仁御家而嗣徽音方具佐文王

之聖得道而坐少廣孰能窮西母之年臣並奉親懽忻

逢誕序動鼓鐘於長樂何慚漢家為壽之儀響環佩於

後宮更邁唐室奉觴之禮臣

御名

誠懽誠忭頓首頓首謹

言

淳熙三年

皇帝進奉壽聖齊明廣慈太上皇后生辰功德

疏

右伏以道妙難名斯能久視坤元至靜乃合無疆祇誦

寶書益延鴻筭

尊號

太上皇后殿下伏願冲虛獲報慈

愛儲祥厚德有容永為萬物之母脩齡莫計密贊長生
之君

賀表

伏以鍾正秋之顥氣固宜履位於長秋播壽母之徽音

是必齊齡於西母載逢誕慶彌切懽悰

中賀恭惟尊號

太上皇后殿下功濟乾元德隆坤載首春展禮方增六
字之名彌月紀祥更上萬年之筭喜氣內充於宮掖和
聲外達於華夷臣幸會自天多儀冠古仰承父母欣侍
膳之安榮俯暨子孫奉含飴之歡樂

淳熙五年

皇帝進奉壽聖齊明廣慈太上皇后生辰功德

疏

右伏以爽氣中分獨得太陰之正祥光下集允符聖母
之生恭即琳房載緒瓊爰尊號太上皇后伏願頤神黃
老邁德姜任年億萬而無窮常奉光堯之樂秋八千而
有永更同王母之時

賀表

伏以仲夏仲秋正浹九旬之日事天事地載稱萬壽之
觴於古罕偕乃今創見中賀恭惟尊號太上皇后殿下
母儀端靜壺政穆宣坤厚無疆婉乾元之純粹月華有

耀齊日馭之光明誕序斯臨綿區胥悅臣虔趨椒壁敬
祝椿齡入戶青雲常記慶都之嘉瑞承盤玉露永資漢
殿之長生

淳熙六年

皇帝進奉壽聖齊明廣慈太上皇后生辰功德
疏

右伏以金莖露滑鍾顙氣於慈闈琳館秋清繡秘文於
歲室恭憑勝事仰贊脩齡尊號太上皇后伏願清淨無

為含洪元吉身居崑閬同金母之長生化洽家邦偕周
王之曼壽

賀表

伏以日夜平分適中於秋籥羲娥迭運同會於壽星參
集休祥來符誕慶

中賀

恭惟尊號

太上皇后殿下德方

而靜寶儉與慈胥宇如姜黷皐父始謀之際嗣徽維似
對文王安樂之時應地無疆降年有永臣欽逢令旦密
侍慈顏講宮中之儀願敬遵於漢事膺天下之養祈

永佐於堯仁

赦文

淳熙二年

太上皇帝慶壽赦文首詞

十二月十七日

門下太極之功不宰其可贊者兩儀之生大明之照無
疆所能推者千歲之至欽惟聖父誕保我家二百餘載
而中天定神器於欹側艱虞之始三十六年而宅位授
朕師於康彊暇豫之時上穹綿有永之年下土洽無爲

之化興言非質日侍慈闈竭幅幘之富而未足伸至養
之誠極尊美之稱而未足表難名之德茲載新於歲律
庸展慶於耆齡前殿奉卮企高皇而踵武大安進膳邁
貞觀以彌文鏘金奏以充庭儼臣工而在列和氣遄周於
宇宙盛容創見於古今仍內奉於母儀庸備單於子道
爲酒以介眉壽具膺純嘏之常立春而下寬書更廣庶
民之福可大赦天下

尾詞

於戲建無窮之基則享無窮之樂命方僕於萬年有非常之事則侈非常之休恩蓋推於四海矧羣黎百姓夙依於覆育而耆老大夫咸自於甄陶今而仁壽之同躋必也安榮之共保諒爾有邦之衆知予錫類之心

淳熙三年

郊祀大禮赦文首詞

十一月八日

門下朕聞柴望修而格藝祖舜朝推肆青之恩禋祭備而享先王周室著保邦之典皆所以對三靈之眷顧成

四海之時雍粵惟眇躬日奉慈訓兢兢行道積十五載
之勤勞翼翼小心副億萬人之愛戴荷兩儀之助順加
列聖之流光邦有榮懷父母之年方永物無疵癘華夷
之衆舉安既底小康敢稽大報乃候初陽之復載陳合
祭之儀始朝真宮念慶源之遠矣隨裸太室思祖烈而
儼然儼王路以安行被袞龍而肆祀壇場珪幣罔勿飾
上下神示罔勿欽黍稷非香儻治馨之或感牲牷不廢
尚民力之俱存雅聲諧六變之音和氣備四時之薦精

誠昭達景况駢臻齋居逢天日之曠溫望拜仰月星之
明潤繫帝臨之顯著非朕德之克堪首歸胙於君親旋
均釐於臣庶言念幅幘之至廣深虞岸獄之未清一夫
向隅豈忘於不樂百姓有過每切於在予溥施蕩滌之
仁誕受厖鴻之祉可大赦天下

尾詞

於戲天嚮有道事之者敢以虛文民懷有仁撫之者在
乎實惠更賴班朝文武分土循良或勵翼於中或布宣

於外使祭澤速傳郵之命而恩言非掛壁之書庶承右
序之休寢格不平之運

青城奏劄

臣適蒙宣諭天氣甚佳因奏自來赦文例是前期具草
無由概見感格今欲於其中增入四句具述晴霽庶幾
四方萬里咸知陛下至誠動天之意恭奉聖訓令添入
謹錄進呈如得允當乞令本院一面咨報中書門下省
施行所有宣讀大本即更不須改易伏乞睿照十一月

十一日奉御寶批依

淳熙六年

明堂大禮赦文首詞

九月十二日

門下朕紹承基緒獲典神天上循列聖之規日奉慈皇
之訓宵衣旰食敢暇逸於分陰非飲卑宮期阜蕃於率
土賴隱顯之交助慶家邦之永寧親壽彌長有行萬年
之歷民生咸遂無違九叙之歌田疇屢豐邊鄙不聳忱
念一純之報習占三歲之祥顧累躬泰時之禋獨未備

總章之饗維周成宗祀洛中陟配於文王維漢武合祠
汶上推嚴於高帝皆用親郊之禮具殫尊祖之誠於鑠
本朝若稽前代倣經路寢有皇佑之彛儀徧秩羣神有
紹興之近制不愆於素可舉而行穆卜季秋之良肇稱
新禮之盛被殊庭而朝薦假清廟以裸將三引先驅建
太常而乘玉輅羣工顯相被袞冕而執鎮圭燎煙升而
精意通和樂奏而靈苻沛兩儀奠位於以合祛二后在
天茲焉並侑環九筵而暇食薄四海以和來扁榜大書

前罄嚴恭之志祺祥免奏後虞滿假之心蓋飭躬弗憚
於予勤而歛福惟恩而民錫甫竣熙事爰霈湛恩嘉與
多方共迎景況可大赦天下

草

尾詞

於戲

天地

好生為德朕克懋於靈承祖宗以博愛為

仁朕允懷於時憲咨亮采惠疇之佐暨秉文經武之臣

協圖康濟之功哀對休嘉之澤

文忠集卷一百一

欽定四庫全書

集部
文忠集卷一百三

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣杜文海

欽定四庫全書

文忠集卷一百二 玉堂類藁二

宋 周必大 撰

麻制一

乾道六年

郊祀加恩制八道

皇子雄武軍節度使開府儀同三司慶王食邑
三千戶食實封一千二百戶愷加食邑一千

戶食實封四百戶制

十二月七日

門下朕涓選休成博宗將禮巍然王公士民之上敢怠
於恭先惕然天地祖宗之承庶幾于誠感仰賴博臨之
况誕膺滋至之祥乃眷嗣賢首敷惠術咨在廷之有衆
咸聽命以無譁具官愷行飭而才高氣和而守正忱恂
見於允蹈聰敏幾於夙成自開朱邸之榮即昇駢旌之
寵袞繡密聯於宰路山河大啟於王封祇事君親有惟
孝惟忠之譽敬居祿位無期驕期侈之愆屬講明禮實

資顯相駿奔太室儼鬱尊亞裸之儀陟恪阼階奉桂酒
二觴之薦茲亟蒙於祭澤肆商賚於賢勞其仍賜履之
舊疆載廣腴田於新邑以答帝心之睠以隆天性之恩
雖曰彝章厥惟異數於戲箕子之疇建其極福已厚於
錫民后稷之祀迄於今祿宜豐於及子往綏鴻施庸對
慈懷可

皇弟少保靜江軍節度使判大宗正事恩平郡
王食邑八千七百戶食實封三千五百戶據

加食邑七百戶食實封三百戶制

十二月十三日

門下朕稽累聖之舊章秩三年之元祀潛天而天潛地而地祇罄於齊明日雨而雨日暘而暘靡違於先後乃眷近親之懿方司屬籍之繁亦既殫助祭之勞時則有揚庭之命皇弟具官璩稟資和易率履靖莊勿用非彝蹈格言於康誥毋桐好逸洽令問於漢藩峻躋棘位之聯寵曳將壇之組王爵久封於半楚宗盟實董於諸姬屬泰疇之親祠越濤江而入覲振振族姓應于嗟之麟

肅肅辟公相於薦之牡茲迄成於熙事宜茂舉於慶條
維書社之加多維賦租之加厚豈特廣厖鴻之澤是將
隆友愛之恩於戲寅亮而弼予一人既揚孤保之職裡
祀而親其九族斯對神明之休往服龍光並昭燕譽可

皇兄岳陽軍節度使開府儀同三司充萬壽觀

使永陽郡王食邑五千三百戶食實封一千

九百戶居廣加食邑七百戶食實封三百戶

制十二月十三日

門下朕觀萃聚於羲爰歌安寧於漢祀王假有廟見萬
物之情帝臨中壇承四方之宇眷言近屬實相盛容逮
昨祉之均敷宜恩綸之誕告皇兄具官居廣行遵賢檢
志樂儒猷信厚有常茂矣本根之庇溫純無玷渾然璧
玉之姿蔚為宗室之英克壯藩維之勢載黼斯袞視公
路之多儀有鸞其旂備將牙之異數啟王封於樂土總
使領於內祠屬三歲之習祥迎一陽而報本相予肆祀
莫如同姓之親保我後生共篤曾孫之慶用埤多邑仍

富實輸於戲黍稷非馨尚式孜孜之訓王侯秉德爰遵
翼翼之鄰朕惟無愧於感神爾亦有辭於被寵益隆譽
處茂對褒康可

太尉保信軍節度使充萬壽觀使武功郡開國
公食邑五千五百戶食實封一千七百戶鄭

藻加食邑五百戶食實封二百戶制

十二月十五日

門下朕在舜璣衡講類帝禋宗之禮辨周圭瓚展祀天
肆裸之誠既聲明馨德之具昭宜祉福榮休之徧錫其歸

文武之胙以重甫申之褒肅爾在廷聽予作命具官某
才猷敏達性行淑均承傳龜龍紫之榮謹流水游龍之
戒卑以自牧樂尊君子之謙高而不危知守諸侯之貴
向閔勞於上閤許均秩於內祠身登齋戒之壇將旄甚
寵名在尉安之府戚里罕倫值三年大報之親郊觀四
姓小侯而入衛掌王宮之禁密資后族之肅恭爰即舊
封載荒新邑以答勲庸之茂以增閎闕之光於戲上帝
垂慶成之恩當及武階之長外戚有守文之助豈專恩

澤之侯朕惟賚予於善人爾尚對揚於休命可

昭慶軍節度使致仕武功郡開國公食邑三千

三百戶食實封一千戶劉懋加食邑五百戶

食實封二百戶制

十二月十五日

門下王者父天母地所以致乎精禋聖人左戚右賢所以興乎廉遜朕躬展陽陵之盛禮眷懷妃族之老臣雖不預於駿奔乃特加於賚予告爾多士揚其高風具官某操行安和性資謙慤知膏粱之期侈慕寒素以好修

是生邦媛之良早被親庭之眷嘉恭勤之有自方虞侍
於無窮朕厯覽漢朝最賢班况因婕妤之預選解越騎
以告歸家累千金慶傳三子繫爾希蹤於前哲亦能謝
事於明時節雖上於高牙門自施於行馬享功成身退
之樂無漏盡夜行之譏茲緣祭澤之頒恩示臣功之勸
助其家食懋以封租於戲行役而乘安車靡責執膳之
禮賀慶而親異姓尚均賜胙之休庶無後艱永有終吉
可

慶遠軍節度使鎮江府駐劄御前諸軍都統制
武功郡開國公食邑三千七百戶食實封一
千三百戶成閔加食邑五百戶食實封二百

戶制 十二月十八日

門下朕穆卜天正敬修郊類內倚峨峨之髦士奉周廟
之璋外資矯矯之虎臣獻淮夷之醎既協成於熙事當
均錫於繁釐明陟示恩夙興聽命具官某稟敦龐之質
賦果毅之才圻父王之爪牙舊服殿巖之寄武將國之

心膂今提天塹之師方邊侯之晏清嘉戎昭之整暇雖
軍國之容或異而乾坤之況則同儻外禦之有勞視駿
犇而奚歎與之多邑益華公社之封長我萬夫增壯轅
門之觀於戲祀與戎為大事曾何執膳受胙之殊武於
文為止戈宜念禁暴安民之助予非僭賞爾尚懋功可

大同軍節度使提舉萬壽觀奉朝請通化郡開
國侯食邑一千五百戶食實封六百戶富察
久安進封開國公加食邑五百戶食實封二

百戶制 十二月十八日

門下朕事天地以合祛尊祖宗而徧饗有經八畧數而
惟一純二精之薦有潔粢豐盛而惟三時五教之修嘉
予內嚮之勁臣觀我面稽之禋禮逮茲賜胙寵以詔廷
具官某氣節沈雄性資純固觥弓束矢久振譽於朔方
就日望雲旋輸忠於北闕榮昇節旄之峻優加祠稟之
豐會陽復之休辰舉燎熏之大典素諒朝宗之志命陪
上雍之班煌煌五輅之安行實參奉引凜凜萬兵之宿

衛仍董徽巡疇庸久即於侯封餒惠肇開於公社併加
多邑之賦以對三神之歡於戲武帝知稅侯之忠既許
屬車之扈仲尼進潞子之爵斯同諸夏之褒益勵良圖
共承景況可

檢校司徒使持節琳州諸軍事琳州刺史充懷
遠軍節度琳州管內觀察處置等使兼御史
大夫闍婆國王食邑一萬九百戶食實封四
千四百戶悉里地茶蘭固野加食邑

闕

戶

食實封二百戶散官勲如故制

十二月十八日

門下朕邸四主而祀上帝備百神服食之儀輯五瑞以
朝諸侯來萬國駿奔之助既兆蒙於祉福斯溥及於華
戎有嘉慕義之邦誕布同仁之澤具官某世雄炎海名
著丹厓粵由淳化之年知嚮本朝之德雖錦衣椎髻阻
趨王會之圖而象齒南金嘗底職方之貢屬侯履長之
旦洊脩報本之禋迎紫時之釐茲惟大賚發鴻臚之詔
豈汝遐遺用加多邑之封以作外臣之寵於戲納夷樂

於太廟敢矜南國之是疆錫土田於附庸尚慰遠人之來慕告於裔壤洽此湛恩可

乾道七年

德壽宮加尊號禮畢右相虞允文轉兩官封成

國公加食邑食實封制

正月十九日

門下德教刑于四海蓋本事親之欽榮懷慶乎一人亦曰用賢之善朕致誠子道儲祉我家牒鏤玉以鋪張載益庭幃之號鼎鉉金而利正肆疇鈞宰之勲涓日班朝

出綸宣衆左正奉大夫守尚書右僕射同中書門下平
章事兼樞密使兼提舉司修四朝國史提舉編修國朝
會要提舉實錄院提舉詳定一司勅令兼制國用使仁
壽郡開國公食邑六千五百戶食實封二千三百戶虞
允文才高而行備質粹而履方見義必為昔聞其勇欲
仁斯至今盡乃心自勵翼於台符久緝熙於政路咸有
一德暨湯后以享天惟茲四人昭武王而迪祿佐佑二
精之祀贊襄三樂之功惟光堯以大哉乾元不言所利

而聖母以至哉坤元乃順無疆因產祥降嘏之沓來思
騰實飛聲而美報刺六經而作制允賴儒真率百辟以
肄儀更資弼直當王春之有俶奉冊寶以同躋日監在
茲禮無違者迄此曠儀之備敢云菲質之能惟國舊章
眷時近輔或以親祠而升秩或由慶禮而進階矧鉅典
之兼成視前規而尤重官遷兩等彌增相紱之光戶溢
萬家肇錫公圭之履哀時徽數旌厥顯庸於戲漢因火
德而得天方永隆於孝治虞以重華而協帝尚屢省於

謨明茂對閔休益攄遠業可特授左光祿大夫依前
云云特封成國公加食邑一千戶食實封四百戶

皇太子某領臨安尹制

四月二十七日

門下正萬邦者繫乎世子任蓋重於元良本諸夏者由
乎京師治兼資乎首善紹休列聖駐蹕三吳惠我無疆
方毓少陽之德施於有政俾臨象日之封皇太子某秀
稟五行生知三善勉勉義方之訓孜孜仁孝之端惟通
乎古者必有以驗於今惟深於道者必有以形於事肆

攷南衙之故實一新大尹之多儀視膳問安進則展事
親之敬牧人馭衆退而觀率下之能諒赤縣之均歡徯
班輪之布政豈特澄源端本示郡國之樞機庶幾自邇
及遐流邦畿之風化若時成憲匪朕私恩宜令皇太子
某領臨安尹主者施行

進皇太子制草奏

臣伏準御筆皇太子惇領臨安尹可依此降制及付下
唐典故二件臣今恭依處分及依倣典故撰到制詞具

草進呈緣上件制書係付有司施行竊恐皇太子別無
被受臣欲依自來詔書體式略換首尾書寫一通降付
皇太子今擬定格式進呈如賜俞允乞速批降付學士
院施行伏取進止

四月二十六日兼權直院臣周某奏奉御筆批並
依

威武軍節度使主管侍衛馬軍司公事開國公
食邑千百戶食實封千百戶李顯忠特復太

尉餘如故制

六月初三日

門下法羽林而置帥既殫宿衛之勞佩金印以名官宜
復武階之長眷言飛將夙著多庸衆偶麗於丹書茲屢
更於華歲揚予新命歸爾舊班具官李顯忠沉毅驍雄
奇龐福艾臨敵身先於士卒輸忠志在於國家馳棘門
霸上之營此真將軍矣得李牧廉頗之將何憂匈奴哉
往在紹興被知太上擢領建章之騎超躋尉府之聯今
閱十年嘗罹一青上宜陽之綬雖薄襦於終朝復鴈門

之騎已浸還於舊貫比隆三接再總萬兵肅號噉於周
廬訓齊不怠按營屯於別戍敷奏可觀積有勤勞肆加
褒渥俾差肩於近列庸示寵於諸軍著玷缺之難難盡
除前咎胡爪牙之轉恤庶勉後圖於戲若漢絳侯如唐
李晟號為名將俱歷此官爾其思高位之至榮慕古人
而自勵仰酬異眷益永壯猷可

王炎轉官除樞密使依舊四川宣撫使制

九月

二十六日

門下碩膚四國是皇亦既久臨於井絡文武萬邦為憲
莫如就正於斗樞雖未賦三年之歸固宜先多祉之受
我有渙號人其樂聞左中大夫參知政事四川宣撫使
清源郡開國侯食邑一千二百戶食實封三百戶賜紫
金魚袋王炎迪志高明賦材英傑負博古通今之學濟
康時經遠之謀皋陶之翼舜朝選雖以衆張良之從漢
祖授或自天粵貳政於中台即宣威於全蜀慮無遺策
事不辭難和衆安民得歡心於將帥補軍蒐乘厲武節

於邊疆邦儲裕於屢毗國馬蕃於互市以其圭觀固深
簡於朕懷無使袞歸復重違於人望何惜異數於昭壯
猷二府分班左右幹鈞樞之柄太微占象東西齊相將
之光按四品以升階度諸侯而賜爵載疇多邑併寵元
戎匪時信臣孰對隆委於戲樞機之重中外所同西顧
未寬則籍精神而折千里羣方庶定則還英俊以彊本
朝往殫厥心終濟於治可特授樞密院使左大中大夫
依前四川宣撫使進封清源郡開國公加食邑一千戶

食實封四百戶

論轉官奏

臣契勘本朝故事以大中大夫為宰相官其樞密使事體亦頗相類自舊未有中大夫充樞密使者昨來汪澈元係通議大夫虞允文元係大中大夫故不轉官今王炎止係中大夫竊慮合轉左大中大夫仍加封邑庶協近制伏取進止

奉御筆批依

乾道八年

虞允文轉官除左丞相制

二月十一日

門下朕紹休聖緒注意元台仰惟前代而迪厥官期咸
寧於萬國爰立作相而置諸左肆命總於百工肇新巖
石之瞻丕聳朝紳之聽左光祿大夫守尚書右僕射同
中書門下平章事兼樞密使兼提舉編脩國朝會要
提舉實錄院提舉詳定一司勅令兼制國用使濟國公
食邑七千五百戶食實封二千七百戶虞允文德全而

才鉅氣裕而志剛以襲經華國之文成應變安民之武
有力則陳而有猷則告恢恢致主之謀無利不興而無
害不除凜凜際時之望徧儀中外久幹鈞樞以修明政
教為先以獎拔賢能為急鎮物如嵩岱之勢其孰敢搖
決事若龜著之明夫何能惑革乃因循之弊副予綜覈
之方勤勞弗懈於初終啟沃愈殫於朝夕朕稽參古誼
考協官稱運道揆於廟堂理無不統繫司存於禁省體
有未專茲用新書首褒茂宰並展在前之略式符虛左

之求仍總鴻樞特超賜位啟名邦於西土衍奉邑於多
田以煥天文三階之光以增國勢九鼎之重於戲自周
而上弼諧之道可稽由漢以來宰輔之官屢易惟正其
名可以求其實惟舉其要可以治其詳朕欲比德唐虞
汝則監臯夔之事業朕欲希功文武汝則觀旦奭之規
模尚無愧於前聞斯有辭於永世可特授特進左丞相
兼樞密使進封華國公加食邑一千戶食實封四百戶

梁克家轉官除右丞相制

門下稷暨益以同謨舜帝謹時幾之戒召與周而並相
成王資左右之功朕肇正宰司簡求人望茲延登於次
輔其具諗於廣廷左大中大夫叅知政事兼權知樞密
院事同知國用事兼同提舉詳定一司勅令清源郡開
國侯食邑一千七百戶食實封五百戶梁克家行粹而
才高道醇而守正躬含章之素履懋格物之清規忠以
事君告嘉猷而無隱敏於應務斷大事而有餘自進位
於疑丞每協恭於廊廟恢四維而勵俗熙庶績以圖寧

名實混淆汝則力裨於綜覈事為苟且汝則密賛於更
張凜有名臣之風浸隆賢弼之望朕方精求至理思懋
永圖選衆而舉臯陶雖予衷之素定夢帝而賚傳說亦
天意之使然會官制之適新宜國成之對策同心輔政
觀二臣調燮之能經體賛元革三府辨章之號既端其
本亦奮爾庸特超四等之階誕昭優渥參幹萬兵之柄
滋厚倚毗肇開公社之封併行國租之入若時異數實
越彛章於戲祖宗閔遠之規朕方力紹今古弼諧之義

爾則深知當正名求治之時任熙載亮功之寄進一言必曰
順天之道立一事必曰因民之情惟百官各得其宜則
萬務悉歸於理勉思交飭允答具贍可特授左正奉大
夫右丞相兼樞密使進封清源郡開國公加食邑一千
戶食實封四百戶

淳熙二年

葉衡罷右丞相除知建寧府制

九月十六日

門下守相入為公卿昔已遵於漢制揆岳出分牧伯今

復用於周官惟中外之迭居蓋始終之叅倚其敷明命

以告治朝通奉大夫右丞相兼樞密使東陽郡開國公

食邑

闕千闕

百戶食實封

闕

百戶葉衡問學提身忠清迪

德蘊應務疏通之識負絕羣敏銳之才民人社稷之權

屢宣勞於郡邑錢穀甲兵之問嘗底績於邦家既簡朕

知亦孚人望間輟別都之禽寢毗大政之原旋獨秉於

國均仍兼持於樞柄有亂臣而致治所資心德之同康

庶事以圖寧正賴股肱之喜何僅更於期月乃祈解於

繁機聽還次相之印章寵畀初潛之組綬朕之待人者可謂至矣爾之報上者固宜如何於戲公台關國體之重輕茲曲全於進退師帥係民情之休戚曾未替於恩榮勉圖屏翰之庸思稱君臣之遇可罷右丞相兼樞密使依前通奉大夫知建寧府封食邑實封如故

淳熙三年

太上慶七十加恩制七道立后制一道伯圭制二道

崇信軍節度使開府儀同三司提舉臨安府洞

霄宮奉化郡開國公食邑

闕千闕

百戶食實

封

闕千闕

百戶史浩加食邑一千戶食實封

四百戶制

正月五日

門下朕歷覽漢唐之君備伸父母之敬奉玉卮於前殿
或展未央之儀響鸞佩於後宮或行興慶之禮雖云盛
舉曾不同時天數佑於予家日交隆於榮養帝堯以康
寧巽位春秋七十而無窮文母以聖善思齊甲子一周

而未艾既並增於榮號復對舉於壽觴適成稀世之儀
誕錫敷天之澤眷言舊相宜煥寵章具官吏浩識量恢
洪機神峻遠輔台時敏素號於博文翊我天飛首當於
大任洊分帥閫久秩祠庭起儒紳而提齋鉞之雄處鄉
社而被袞衣之貴予惟念舊人莫與儔是遵加地之文
共對丕天之律於戲慶二親之壽溥均海宇之湛恩增
千戶之封獨用宰司之故事蓋禮之盛者澤必廣而位
之隆者榮亦殊尚忱念於眷懷以對揚於命數可

保信軍節度使開府儀同三司充萬壽觀使武

功郡開國公食邑

闕

千

闕

百戶食實封

闕

千

闕百戶鄭藻進封榮國公加食邑五百戶食

實封三百戶制

五日

門下親其親而為禮非徽號不足表無疆之休老吾老
以及人非寵恩不足彰莫大之慶乃歲事於一陽之復
乃頒書於四序之元盛儀一行誠意兩得於以興臣子
之敬於以廣華夷之仁敷時褒章旌我懿戚具官鄭藻

受才通敏制行安和逮事祐陵綽有中朝之矩範被知
太上蔚為異姓之表儀位愈貴而心愈恭年彌高而力
彌裕比陳玉冊榮冕金蟬既顯相於禮容仍攝承於使
領蓋特寵四朝之舊匪徒為百辟之光茲舉慶條肆開
公社於戲天地有域中之大朕方酬覆載之恩爵齒達天
下之尊爾寔預榮親之寵茲為國家之志盛時乃帝王
之所稀茂對洪休毋忘素履可

武泰軍節度使開府儀同三司充萬壽觀使信

安郡開國公食邑

闕

千

闕百戶食實封

闕

千

五百戶曾覲加食邑五百戶食實封三百戶

制五日

門下朕粵稽列辟之盛疇越放勲之先德既冠於百王
年仍高於五帝則天為大康衢形爾極之謠克遜允恭
華封有聖人之祝孰追懿鑠繁我慈皇比參訂於師言
庸肇稱於鉅典逮均慶賜可後舊人具官曾覲夙稟通
才進逢亨運以辭章而被遇多歷歲時居富貴而守謙

久安閒適領節旄於蜀道總使範於祠庭肅爾多儀相
予盛禮朔冬奉冊綴三事以我冠春日稱觴榮萬花而
會升宜疇多邑用溥醴恩於戲蕩蕩民無能名既不揚
於德業皇皇事之壯觀顧何吝於龍光惟上聖為能兼
古今之徽惟至尊為能錫臣鄰之祉往思祇服勿替恪
恭可

昭慶軍節度使知荆南軍府事提舉學事兼管
內勸農使充荆湖北路安撫使馬步軍都總

管兼本路營田使專一措置提督修城和義

郡開國公食邑

闕

千

闕

百戶食實封

闕

千

闕

百戶楊俠進封和義郡開國公加食邑五百

戶食實封二百戶制

六日

門下朕恪奉親歡懋隆孝治問在朝問在野固莫測於堯仁得其位得其名當力揚於舜善乃練日時之吉具陳儀物之多既鏤牒以增休美之稱又奉觴以篤延長之慶眷言藩服嘗侍籌帷雖阻預於班庭顧可稽於詔

爵具官楊倓恭勤自勵明敏推優文昌參喉舌之聯右
府效股肱之力追惟乃父夙簡慈衷有如嗣子之才寢
歷周行之選聞修慶典諒感隆知殿邦雖異於滯南存
闕寧忘於拱北用錫諸公之履仍加多邑之腴於戲稀
闊盛儀是謂萬歲一純之遇便蕃異數足為五侯九伯
之光尚祇若於恩言益勉圖於忠報可

武康軍節度使捧日天武四廂都指揮使提舉
隆興府玉隆萬壽宮武功郡開國公食邑闕

千闕百戶食實封闕千闕百戶吳拱加食邑

五百戶食實封二百戶制六日

門下朕纂中興之運仰太上之功視黃屋以非心雖多
辭無以紀冲虛之美因廣成而得道雖巧歷莫能推平
格之年姑率籲於衆言庸鋪張於大慶惟時將帥同國
光榮具官吳拱世授一編身經百戰當紹興之盛際共
武服者有年入則宣勞殿陛之間出則禦侮封疆之外
士多心悅予益汝知雖輦鼓凝思已趣賜環之命而簪

纓稱壽莫陪鳴玉之班其推行食之恩以作來朝之寵
曹為幸遇實越常藝於戲五三六經載籍之傳孰若今
顯號尊名之建萬有千歲眉壽無害亦惟爾大夫庶士
之宜式遄六纛之驅庸對兩宮之眷可

皇弟保康軍節度使權主奉益王祭祀天水郡
開國公食邑二千八百戶食實封八百戶加
食邑五百戶食實封二百戶制

九日

門下朕誕受丕圖躬行要道荷天地非常之况增庭闈

有永之年日至揚徽得戊申之朔旦春元上壽逢甲午
之剛辰孝弟發諸朝廷德教加於百姓是敷成渙載錫
近親具官居中秀稟天支譽高公姓弊時忱而自勉庸
祇德以日新緬維端獻之賢王實乃厚陵之秀子於今
三世有若諸孫日趨劍履之班坐擁節旄之貴曲成藏
事即獲預於榮觀盤石數封肆並加於采地於戲一人
有慶而兆民賴况同周室之宗盟九族既睦則萬邦和
蓋本陶唐之德化往綏爾祿尚遠乃猷可

昭慶軍節度使致仕武功郡開國公食邑四千

三百戶食實封一千四百戶劉懋加食邑五

百戶食實封二百戶制

九日

門下大德必得其壽實天人相與之符貴老為近於親
亦今昔共由之道朕履至尊之寶位慶太上之修齡發
冊廣朝霈恩諸夏乃眷里居之舊亶為妃族之英宜敷
詔音用錫爾祉具官劉懋志尚清逸性資靖莊早參戚
畹之聯浸陟戎班之貴方華轂朱輪之驚起赤松黃石

之思雖十五年無印組之縻寧居寵利然千萬歲上宮庭
之壽實預榮懷是因慶澤之施特衍邑租之入於戲四
代同歸於上齒未始遺年二踈自樂於賜金是能知止
往服旌嘉之命永為耆艾之光可

端明殿學士趙伯圭除安德軍節度使加食邑

食實封制

二月六日

門下朕觀國朝之制重方鎮之權外則神武折衝資鬼
置心腹之助內則太宗維翰茂葛藟本根之功雖勞佚

之或殊在蕃宣而則一茲仰承於慈訓思益固於邦圖
首褒文武兼資之英蓋得親賢並用之意式是舊典揚
於大庭端明殿學士朝奉大夫提舉江西太平興國宮
天水郡開國侯食邑一千二百戶賜紫金魚袋趙伯圭
良心秉於天資令德由於世濟簡廉樂道遠追中壘之
風恭儉好書夙慕獻王之學示宗盟之楷則宣仕籍之
勤勞出守天台河決三吳之潤久臨鄞水海澄萬里之
波粵就燕閒彌高譽處方藉維城之畧盍稽換節之規

矧秘殿通班寢極侍臣之高選宜齋壇煥寵特隆元帥
之多儀是用嚴閫制於閫中領祠官於洪井橐龔戟轟
誕頒新命之華山川土田更廣舊封之履於戲制節謹
度者諸侯之孝惡盈好謙者君子之光高而不危乃可
長富貴之守卑以自牧斯能利邑國之征尚允蹈於聖
言庸永彊於王室可特授安德軍節度使提舉隆興府
玉隆萬壽宮任便居住加食邑五百戶食實封二百戶
封如故

立皇后謝氏制

八月十四日

門下乾健坤順所以同尊乎太極陽剛陰相所以並育乎羣生朕上奉親權下敷民則念佐餒當施於東內而親蠶未講於北郊欽承聖父之詔音趣定長秋之位序是登碩媛庸告大廷貴妃謝氏恭儉而柔和靜專而聰敏異表允符乎法相令儀夙本於良家蚤從藩邸之遊蓋稟庭闈之命大橫應卜正惟竇后之來故劒可求孰若平君之舊自處四妃之首殆更一紀之餘禮有脫簪

贊我勵精之政衣無曳地副予敦樸之心亦既宣內助
之勤其可避中宮之選矧明揚於慈訓仍申諭於輔臣
謂衆志之素孚宜徽章之亟舉因乳保而依方進雖常
從舊譜於汝南推源流而系謝安盍遂復華宗於江左
茲誕頒於命數庸表慶于邦家罩衣加追王之笄螭紐
賁範金之寶於戲朕日奉帝堯之養后其思居汭之虞
嬪朕時承文母之顏后必鑒嗣徽之周妣奉玉璽於祖
廟則可以教四海之順新彤管於女師則可以刑二南

之風尚表正於宮闈永綏將於福履可

趙伯圭除開府儀同三司充萬壽觀使任便居

住進封開國公加食邑食實封制

九月二十四日

門下周重天支公族多聯於三事唐親帝冑台司嘗用
於九人逮我皇家參稽古誼視其儀物所以彊磐石之
宗遂乃安閒所以樂常華之燕允合大公之道抑隆同
姓之恩乃眷親賢載揚綸綍安德軍節度使提舉隆興
府玉隆萬壽宮任便居住天水郡開國侯食邑一千七

百戶食實封二百戶趙伯圭受才博敏蹈德端良法度
是遵言必依於忠孝詩書攸好心不接於奇袤故居家
流惠順之聲而典郡迪中和之效繫於慈父自樂大庭
雖事物之非心獨宗支之在念謂姬姓半封於天下而
近親多自於南陽申眷禮以有加錫榮恩而無已駢旄
畫戟甫示寵於將壇赤舄繡裳更參華於宰路正壽宮
之使領開茅社之公封仍拓土田併蕃命數於戲重名
器則士心丕勸朕寧輕以假人倚宗師而王室舉安爾

尚思於懷德惟不侈不驕如在豐之戒則而昌而熾若
保魯之功尚欽率於訓言庶益隆於譽處可特授開府
儀同三司依前安德軍節度使充萬壽觀使在外任便
居住進封天水郡開國公加食邑七百戶食實封三百
戶

論合充宮觀使奏

臣伏準御封付下中書門下省熟狀趙伯圭除使相提
舉洞霄宮蓋緣宮觀使合係在京差遣故用史浩例止

除提舉宮觀臣竊見自來宗室戚里如士樽錢忱及見
今恩平郡王璩之類官至使相已上即除宮觀使許其
在外居住亦有纔建節使充宮觀使者如高世則等是
也又王安石熙寧九年以使相鎮金陵既而力請納節
遂以大觀文充集禧觀使而紹興間張浚亦以檢校少
傅節度使充萬壽觀使以此知在京宮觀使似可任便
居住但臣省記不審兼未知見行格法不敢臆決欲望
聖慈來早降付三省更加考訂如合改正乞貼麻行下

或近來無使相充在京宮觀使任便居住體例即合依已降處分施行臣既有所見不敢不奏伏取進止

奉御筆批可依士樽等體例除宮觀使

文忠集卷一百二

欽定四庫全書

文忠集卷一百三

玉堂類藁三

宋周必大撰

麻制二

皇弟少保靜江軍節度使充醴泉觀使恩平郡
王食邑一萬八百戶食實封四千四百戶
加食邑七百戶食實封三百戶制

門下朕上嘉成周卓冠隆古分寶玉於伯叔時庸展親

賜賑膳於弟兄以佐保國茲均奈澤肆協禮經乃眷宗
盟首頒名命具官璩䟽通和粹謙恭坦夷貝冑朱綬視
建牙於東魯旃旌靖茂榮賜履於孟侯自歸糾族之權
坐享奉祠之樂朝宗有志奉幣而覲甘泉導蹕無譁珥
貂而陪泰時迄拜熙成之况允資顯相之勞既厚錫於
金繒仍載荒於井邑於戲肅祗齋戒予一人敢憚於恭
先富貴安榮爾萬國實均於賚予並思夾輔茂對闕休

闕

皇子雄武軍保寧軍節度使開府儀同三司判

明州軍州事提舉學事兼管內勸農使兼沿

海制置使魏王食邑八千戶食實封四千戶

門下卿類徧神瑞必班於羣后漢郊見帝金亦賜於諸

王矧予元祀之成思廣湛恩之錫若時賢子實簡慈懷
其數寵章以首藩服具官愷鍾英瓊幹流慶璿源笙磬
鼓鏞有克諧之遠韻琮璜珪璧無可指之纖瑕自分土
於海邦尤宅心於民事陂開九澤考吏課以惟優麥茂
兩岐閱俘圖而載懌雖覲圭之未展而王祭之實共宜
拓土田用均福祿於戲是宜是饗朕方對天地祖宗之
休惟孝惟忠爾夙明君臣父子之義尚因昨祉益固盤
維

武泰軍節度使開府儀同三司充萬壽觀使信
安郡開國公食邑二千六百戶食實封一千
戶曾覲加食邑五百戶食實封三百戶制

門下朕克堪用德咸秩無文先六月以戒期各揚乃職
命五臣而總使以迄於成逮此均釐首茲馭貴具官曾
覲才華敏妙器度寬和朱芾暎珩慕壯猷於方叔綠滕
照乘保眉壽於僖侯既頒三事之崇宜勵多儀之助提
綱振領道塗次舍之畢修款廟徂郊輦輅烝徒之咸賴

勤勞至矣褒賞隨之是豐多戶之輸仍衍真番之入厥
惟餽惠亦以勸功於戲禮有五經祭為最重王之八柄
爵乃居先尚圖稱於茂恩庶永綏於來譽

太尉威武軍節度使提舉江州太平興國宮隴
西郡開國公食邑五千六百戶食實封一千
八百戶李顯忠加食邑五百戶食實封二百
戶制

門下朕恪修郊報備輯邦儀觀大盾之前驅時則念攘

除之帥對朱干之武舞時則思蹈厲之臣豈以居家而
忘賜胙具官李顯忠真誠不貳英槩無前威暢鴈門蚤
繼家聲之遠祥開鵠印晚聯尉府之華雖膂力之或愆
曾眷懷之未憖十二之龍雅雅屬昇帖妥之壇三千之
旄央央夙振淵聞之旅紛鷗冠之拱北獨號將之在東
是衍新畬以光舊伐於戲思文嚴乎稷配賚及多方掌
武重於秦官恩光右列祇拜穹蒼之况益肩忠赤之心
昭慶軍節度使致仕武功郡開國公食邑四千

八百戶食實封一千六百戶劉懋加食邑五

百戶食實封二百戶制

十二月四日

門下周祀禮年共杖咸於耆氏漢儀篤舊致廟昨於太
常眷言妃族之英久著里居之譽厥有鴻需於昭令猷
具官劉懋溫恭秉彝冲約成性辰彼碩女輔陰教於慈
庭賢哉大夫保陽休於暮齒一享安居之逸四膺惠術
之施茲駕行宮載修柴燎克禋克祀徧方望之羣神如
式如幾秩邦家之多祐申褒貴戚增衍本封於戲俾爾

壽臧荒土田於徐宅以俟耄老加勞賜於葵邱欽承優異之恩永保康寧之福可

皇弟保康軍節度使權主奉益王祭祀天水郡

開國公食邑三千三百戶食實封一千戶居

中加食邑五百戶食實封二百戶制

十二月
初四日

門下朕率親賢之衆展郊廟之容受命咸宜禧已承於十乘在宗載考露方湛於諸侯令以時行恩由貴始具官居中姿凝豐裕性迪謙和大雅不羣如高帝之孫子

成人有德若文王之本支茲習歲祥是稱冬祀亦有高
廩因報豐年之功豈無他人孰如同姓之助緊肅雖之
罔怠在褒表以疇先肆即舊封載荒新邑於戲禮儀卒
度粲其棠棣之華福祿來崇異彼角弓之怨勉旃信厚
對越光靈可

懷遠軍節度使琳州管內觀察處置等使金紫
光祿大夫檢校司徒使持節琳州諸軍事琳
州刺史兼御史大夫上柱國闍婆國王食邑

一萬一千九百戶食實封四千八百戶悉地
里茶蘭固野加食邑五百戶食實封二百戶

制 十二月四日

門下王者參天貳地一視同仁故鞶鞶名官聲樂並施
於祭祀而明堂定位蠻夷分列於東南豈伊慶賜之行
曾是華離之異具官悉地里茶蘭固野忠純傳世慈惠撫
封奉我明王雖隔鯨波之遠以其寶贄自通象譯之重
屬陽陞之稱禋為嘉師而介福配天其澤罔敢失隆荷帝

鑒之博臨率土之濱莫非王臣宜海隅之遐暨寵加國
邑榮對神釐於戲久無烈風汝諒占於予祀丕冒出日
台深眷於爾邦徃祇綸綍之言永責要荒之服可

淳熙四年

安南國王李天祚男龍翰襲封制

三月十三日

門下朕寅威寶命奄甸嘉師無怠無荒深謹暨南之教
曰同曰覲丕嘉拱北之星廼眷一邦茲傳七世飭宣典
冊播告臣工故推誠順化崇義懷忠保信嚮德安遠承

和秉禮歸仁協恭勵節繼美遵度履正彰善贊治守謙
功臣特進檢校太師靜海軍節度觀察處置等使兼御
史大夫上柱國安南國王食邑二萬戶食實封七千八
百戶贈侍中李天祚男龍翰流慶有源受材孔裕雖尚
居於幼穉已知繼於踐修繫乃先王夙彰令問胙土分
茅之久彌四十年梯山航海之輸踰數千里克知殿若
日篤不忘茲永慨於遺章爰首褒於受嗣旌節按定陵
之制官儀聯漢相之班即樂國以肇封既從世襲極真

王而錫命何待次升加以土田被之功號雖纂服之惟
舊在殿邦而則新允續前徽尚綏後福於戲建爾尹茲
東夏古尤重於象賢維汝居國南鄉今勿忘於來享俾
周無斁曰商是常豈惟予一人以寧亦保爾黎民之利
可特授靜海軍節度觀察處置等使特進檢校太尉兼
御史大夫上柱國特封安南國王食邑二千戶食實封
一千戶仍賜推誠順化功臣

皇子愷除荆南集慶軍節度使行江陵尹加食

邑實封制

四月五日

門下四牡入覲旂章載錫於諸侯三公出封車服皆隆
於九命茲謂周家之忠厚實壯文王之本支眷言愛子
之賢來報名藩之政是稽古誼爰詔所庭皇子雄武保
寧節度使開府儀同三司判明州軍州事兼管內勸農
使兼沿海制置使魏王食邑九千戶食實封三千六百
戶愷志節安和德猷粹穆淑身謹行居有令名保國又
民動無過舉自再分於銅武嘗屢下於璽書念夫表海

之勞遂乃朝宗之願三雍奉對固深留邸之思二陝分
疆莫遏憇棠之請宜敷帝祉以答毗謠惟庶正之隆名
乃承平之異數昔優褒於子弟今率用於典常載披輿
地之圖雙換齋壇之節民瞻爾赫荊州還府號之新慶
即家餘毫社契王封之舊予之多邑豐厥實輸誕頒典
冊之華諒愜旒倪之志於戲班高尹日夙嘉春見之朝
賞候景風庸對夏時之志惟制節謹度則貴可長守惟
以公滅私則民其允懷歸寧爾邦典聽朕教可特授荆

南集慶軍節度使依前開府儀同三司行江陵尹判明
州軍州事兼管內勸農使兼沿海制置使魏王加食邑
一千戶食實封四百戶

淳熙五年

史浩除右丞相制

三月十七日

門下朕儀圖俊傑勵相邦家受命溥將協濟藝祖興王
之業治民祇懼共恢光堯復古之勲念弄印者累年嘗
命龜而載卜人惟求舊既朕志之素孚民具爾瞻亦物

情之衆允煥以大號揚示外朝少保觀文殿學士充醴
泉觀使侍讀永國公食邑七千五百戶食實封三千三
百戶史浩道廣而智周才宏而德備經綸之蘊早自許
於功名寬裕之懷時莫窺於器量東學翼天飛之運中
階符帝賚之祥自弼亮於初元即宣昭於美業敬王如
孟子非仁義不陳於前告后若君陳有謀猷乃順於外
方參和於鼎飪旋力解於機衡比趨召環進陪經幄姬
公邁返初無四國之言裴度來歸尚使兩河之畏屬宵

旰勵精之日適辨章虛席之時宜續前功再膺大任易
零陵之舊壤荒洪水之新封增衍土田併隆體號惟待
之不輕則望之彌重惟始之不易則終之實難予其仰
成人且觀政於戲兆姓輯於下然後可以調陰陽四維
張於朝然後可以正法度堅忠實之志則誕謾罔不革
絕親黨之私則除授罔不公使奠枕如淳化雍熙之間
而迓衡如至和皇祐之際庶益光於舊學斯無負於殊
知

例合陞次國加食邑一千戶食實封四百戶今
擬次國名如後伏乞御筆點定一處以憑遵依
施行

衛 隨 蔡 廣

右謹錄進呈伏取聖裁

三月十七日奉御批更不轉官封衛國公

皇子魏王愷除永興成德軍節度使雍州牧加

食邑食實封制

閏六月十二日

門下朕博觀前代之文樂取成周之制初則恩加子弟
榮疏五等之封建其日奏勲庸越進九州之長以阜成
於兆姓以夾輔於丕基眷我親賢久於藩翰參用典常
之舊載颺綸綍之新皇子荆南集慶軍節度使開府儀
同三司行江陵尹判明州軍州事兼管內勸農使兼沿
海制置使魏王食品一萬戶食實封四千戶愷植德端
良受才英邁蹈詩書之至樂懷忠孝之永圖霄極憑暉
夙昨王封之貴藩維分鎮恪修侯度之功熙然田里之

安翁爾士夫之譽奉公履正獨倡率於列城簡賦平徭
首遵承於美意間推功於上介居浹潤於行都謙謙自
牧之光翼翼令儀之則念八載宣勞於外實簡慈懷嘉
兩邦報政之優特隆徽數是用以古元侯之重賁今雙
鎮之華旌麾遙領於長安節制兼臨於真定腴田載衍
幹食隨增藩宣雖殿於東南威重庶加乎西北於戲八
命作牧陟明昭考績之功四方為綱進律示有功之勸
尚對揚於休命永膺保於令名可特授永興成德軍節

度使雍州牧依前開府儀同三司判明州軍州事兼管
內勸農使兼沿海制置使加食邑一千戶食實封四百
戶

乞改正魏王鎮牧奏

臣今月十二日準內降熟狀皇子愷改成德彰信軍節
度使行荊州牧內有疑似合奏請下項

一臣契勘彰信軍係是京東西路曹州徽宗皇帝曾為
本鎮節度使後來所以遂陞作興仁府今來未審合

與不合改易

一舊來親王帶牧並就本鎮謂如山南西道節度使即帶興元牧蓋山南西道係興元軍額故也又如鎮海泰寧軍節度使即帶青州牧兼兗州牧蓋鎮海是青州軍額泰寧是兗州軍額今來成德軍係是真定府即與荊州牧不相應未審合與不合改易

右件如前或恐不及付三省商量即未審合如何擬進
伏取聖旨

閏六月十二日奉御批如本院有大鎮文本可擬
有無妨礙進入別選點更具就本鎮帶收故事奏
來

又奏

臣昨於去年夏草魏王除荆南節度使江陵尹制之時
初疑亦有重疊緣政和中曾有除授又夜中無處檢閱
不敢省記具奏暨明日方知端拱元年真宗曾為江陵
尹荆南節度使已無及今因魏王加恩就行改正甚為

允當但兩鎮合帶兩牧若用河東淮南節度使太原牧
兼揚州牧頗似穩當蓋自來親王兩鎮節度使即無帶
一州牧者已依聖訓別狀錄進或恐驟加兩牧事體稍
重則欲用成德軍劍南西川節度使却帶真定尹兼成
都尹加食邑食實封乃是移大鎮加兩尹頗為適中且
合舊制竊恐夜深有妨取旨又若多擬鎮名即恐有不
合帶尹牧去處別致差互輒敢冒昧奏聞如或未安伏
聽處分

閏六月十二日奉御批只於兩鎮上就本鎮止帶
一牧 十二日三更後入此奏五更初準御批只
於兩鎮上就本鎮止帶一牧頗為得中至十五日
御藥吳回傳旨取原批進入十六日刮去頗為得
中四字吳回復傳旨降下

玉牒所進三祖下第六世仙源類譜並仁宗十
年玉牒提舉官少保右丞相史浩加食邑食
實封制 十月二十三日

門下繫麟趾於周南賴姬公之協贊首猗那於商頌資
考甫之多聞有華公族之振振不顯湯孫之穆穆惟時
元老實企前良茲涓吉以奏篇爰演綸而亶衆少保右
丞相衛國公食邑八千五百戶食實封三千七百戶史
浩碩才經世厚德表民弼予一人夙推寅亮之美式是
百辟綽有柔嘉之風既甄陶士類以寧亦斧藻皇猷而
助治念唐室開成而後肇新史牒之名暨我家至道以
來初紀神明之胄粵從時邁增廣宏模網羅屬藉之遺

潤色累朝之盛命鴻儒而振領率諸彥以成書登名數
千備三祖本支之六世垂裕億載次昭陵德業之十年
嘗恭覽於昕庭旋閱藏於邃宇肆甄乃績將進厥官屬
避寵以抗章即貶恩而從欲寧無異數昭我至懷其行
食於土田庸策勛於翰墨於戲慶仙源之遠則親親之
誼不可忘思祖烈之貽則繼繼之心不敢怠蓋布在方
策者纂修之力而達乎朝廷者輔相之功勉迪邦彛並
光儒效可依前少保右丞相衛國公特加食邑一千戶

食實封四百戶

進呈仁宗玉牒史浩轉官候旨選日鎖院奏

契勘本院自來宰臣加恩鎖院降制係前準指揮之後
即下太史局擇日取旨鎖院今準尚書省劄子十月十
二日奉聖旨玉牒所進呈三祖下第六世仙源類譜仁
宗皇帝玉牒了畢提舉官吏浩禮儀使趙雄可各轉兩
官依例加恩除趙雄係屬朝廷施行外所有史浩見例
少保右丞相衛國公若轉兩官係轉少師事體頗重本

院未敢依常例便行選日進擬今來直候聖旨處分付院之後方下太史局選擇取旨施行伏乞睿照

史浩罷相除少傅保寧軍節度使充醴泉觀使

兼侍讀加食邑食實封制

十一月十四日

門下一相勤勞處內既懷均佚之心三孤德義弼予斯厚優賢之禮眷言宿望懇避繁機誕推從欲之仁顯布告廷之命少保右丞相衛國公食邑九千五百戶食實封四千一百戶史浩恭寬敏惠明允篤誠決萬事之周

材見諸施設貫六經之要道發以詞華會風雲於潛躍之中翊日月於照臨之始燮調元化經綸之譽孔昭寧輯黎民屏翰之功亦著粵從再相浸閱三時邦彛循清靜之規王度嚮粹夷之美方深注意共底迂衡廼荐控於衷忱殊弗居於寵利囊封莫遏陟典難稽絺冕篆車進新班於亞傳雕戈錫盾還舊節於東陽表儀虎觀之儒先燕息祥源之使領拓其奉邑衍以真畬昔昌朝敷皇祐之經創班聯於秘殿而大亮釋熙寧之政兼將相

於內祠茲參兩朝優異之恩庸作一代耆英之寵於戲
仲山甫既明且哲夙高補袞之勲房玄齡善始以終寧
復吝權之意夫已遠一日萬微之丕務則將聞三王二
帝之昌言謀焉就之遐不謂矣可罷右丞相特授少傅
保寧軍節度使充醴泉觀使兼侍讀依前衛國公加食
邑一千戶食實封四百戶

淳熙六年

皇弟璩除少傅加食邑食實封制

正月十日

門下詔爵祿以馭臣莫重三公之任兄弟兄而為政蓋
先九族之親乃眷宗英實聯貴介夙著維城之助屢更
考績之期越進新班式孚衆聽少保靜江軍節度使充
醴泉觀使恩平郡王食邑一萬一千五百戶食實封四
千七百戶璩質全樂易業懋溫純謹夙夜之操修踐詩
書之猷訓振振其德闕睢之應賴焉韡韡其光棠棣之
華著矣一司屬籍十閱歲陰自改涖於內祠仍燕居於
東粵朕纂承滋久雍睦為先興言近族之良每示注懷

之厚昔相好矣豈忘爰處之時今錫予之何待來朝之
日是用誕頒典冊益固盤維棘路增崇既序陞於亞傅
茅封加重仍並行於多腴以圖夾輔之勲以教庶民之悌
於戲周尊聃季由克保於令名漢重河間在能幾於大
雅尚思前矩庸對茂恩可特授少傅依前靜江軍節度
使充醴泉觀使恩平郡王加食邑七百戶食實封三百
戶

曾覲除少保改鎮充醴泉觀使加食邑食實封

制 正月十五日

門下八統馭民敬古在進賢之上三孤辨等正儀高時
揖之中眷念舊人獨存者老久榮兼於將相盍序進於
班聯揆以剛辰告於列位武泰軍節度使開府儀同三
司充萬壽觀使信安郡開國公食邑三千一百戶食實
封一千三百戶曾覲性涵溫厚識蘊通明辭章焜耀於
一時議論馳驅於千載事予潛邸夙罄於勤勞際我昌
期居多於忠益處燕閒而自適履富貴而能謙歲月屢

遷眷知彌異朕歷覽興王之代率優附翼之臣誓紀帶
河沛邑盡封侯之後詩歌伐木周邦多歸厚之民若時
貽背之賢可後龍光之渥是用升華孤棘新亞保之威
儀分鎮葭萌換元戎之節制易使名於真館衍封食於
上畚衮繡有光絲綸甚寵於戲漢家再造賞朱佑之舊
恩唐室方興嘆元超之白首勉思古誼益介多祥可特
授少保寧武軍節度使充醴泉館使依前信安郡開國
公加食邑七百戶食實封三百戶

秘書省進今上會要十年經修官王淮轉官加

食邑食實封制

八月十一日

門下重華受禪史推壬午之初元神祖勵精書備熙寧
之十載繫子涼德適契丕彝覽副墨之浩繁嘉汗青之
勤勩申念提剛之舊誕頒懋賞之新通議大夫樞密使
東陽郡開國公食邑五千戶食實封一千七百戶王淮
篤實而通明直方而恭懿蘊經綸之事業撫黼黻之文
章簡求會遇於闕齡圖任周旋於二柄安世典樞機之

職慎密自將張良運帷幄之籌智名無競茲進圖書之府
來陳政事之原謂榮奉庭闈實亘古未聞之至樂而勤綏
夷夏有歷來可見之宏規紀綱法度之相維禮樂德刑
之交舉必提其要屢省乃成雖編之詩書或愧夏商之
治然布在方策勉晞文武之功惟前事之不忘庶將來
之有補逮閱奏篇之善特推恩典之優凡臣工載筆之
多率增華秩矧樞輔編朝之久寧廢昔勞文階躋三品
之崇公社廣四封之履於戲漢家之有制度非儒先何

以發揮周官之師典常惟弼直廼能修輔率屬嘗資於
指授表民正賴於躬行用光不一之書斯著無窮之問
可特授通奉大夫依前樞密院使東陽郡開國公加食
邑一千戶食實封四百戶

明堂加恩制十四道

宣奉大夫右丞相魯郡開國公食邑五千四百
戶食實封一千八百戶趙雄加食邑一千戶
食實封四百戶

門下朕惟仁廟御圖之日是謂本朝極治之年斷自聖
心躬行宗祠合祛高厚安佑祖宗受祿無疆既華夷之
綏靖貽謀有永宜社稷之靈長太上固常遵於前冲人
其敢怠於後聿來信順之助可驗天人之符裸將太宮
霖潦驟霽陟恪太寢月華正中維時相臣實總使職逮
侈祭澤首敷慶條具官趙雄德業優於佐王謀猷裕於
經國鎮定大事如彥博之恢闔貫通羣經如宋庠之博
洽兼此二臣之烈昭哉皇祐之勛多士嚮方庶民案堵

繫神明之可告在典禮以當行蟬冕珥貂凜宗工之風
采衮衣繪雉陪初獻之威儀俾予上接三靈之歡下推
四海之福情文交舉先後不違雖曰居歆之祥厥惟顯
相之力其並加於封邑以均賚於神釐於戲在成湯時
尹躬有享天之德及太戊世臣扈有格帝之功尚因大
饗之成同企前猷之肖母令斯道專美於商可

通奉大夫樞密使東陽郡開國公食邑六千戶
食實封二千一百戶王淮加食邑一千戶食

實封四百戶制

九月二十三日

門下朕屬觀紹興初元之詔專取皇祐大饗之儀謂克蒙休最為合禮蓋周室考工之制駁雜而難稽漢家玉帶之圖迂踈而無取惟潔除於路寢可哀對於大神既便於今亦符於古匪曰一時之綿蕝茲惟萬世之準繩方祇奉於慈謀盍遵行於故實嘉予樞輔相我禮容逮錫天休首敷邦渙具官王淮勲業可以致主謨明可以憲邦精神折衝自高仁者之勇文學美政允謂儒林之

宗念仁皇肇講於親祠惟寵藉實提於兵柄雖歲年之
已遠適名位之俱同資乃輯寧軍民之勞成予制作禮
樂之事曰雨曰暘之協應潛天潛地而感通綽佩無譁
侍立齋房之邃珥貂有耀道行幘幄之嚴端臻瑞應之
多深倚弼諧之助錫土田於舊履侈況施於高靈於戲
惠于宗工思齊所以無恫怨詒爾多福天保所以有吉
蠲惟君臣相須若股肱則天人之應如影響永肩一德
迄濟多盤可

皇子永興成德軍節度使雍州牧開府儀同三
司判明州軍州事兼管內勸農使兼沿海制
置使魏王食邑一萬一千戶食實封四千四
百戶愷加食邑一千戶食實封四百戶制九

月二十四日

門下朕涓選吉辛肇修宗祀出款廟室入登堂筵天施
地生丕展精禋之報祖功宗德並嚴升侑之儀和氣充
於灌圭之時美光燭於奠玉之際敷錫惠衍寵綏賢王

具官愷明敏靖莊肅恭和順翼翼動循於法度孜孜常
警於宴安亦烏淑旂久賜真王之履朱轡森戟兼分名
壤之麾屬重屋之親祠賴庶邦之職助雖乃身居外阻
大糒之是承而厥貢在廷異包茅之不入用申加於井
地仍載衍於戶租既增帝子之華亦顯國容之盛於戲
漢金酎於高廟有嘉藩國之恭周賑歸於魯侯是錫天
王之命以示榮懷之慶以昭施報之恩祇服寵光益堅
忠孝可

皇弟少傅靜江軍節度使充醴泉觀使恩平郡

王食邑二萬二千二百戶食實封五千戶璩

加食邑七百度食實封三百戶制

九月二十四日

門下朕詠臣工之詩知諸侯嚴於助祭讀宗伯之禮知
同姓重乎執觴蓋下有以服其勤勞則上與之同其福
祿惟時介弟來侍親祠方誕受於神釐肆寵榮於詔綽具
官璩性資通敏業履溫純郢客才華早賜長安之業子
牟忠愛每馳魏閣之心序朝高孤棘之班列爵啓王封

之社屬九筵之肇祀習卜歲祥念三載之居東許陪秋
覲茲荷乾祗之況是推友睦之恩衍以戶封豐之幹食
於戲祭而餽惠固欲其均柄以馭臣必循其序惟貴也
則當先於賤惟親也不可後於疎茂對光榮並思謙跼
可

少傅保寧軍節度使充醴泉觀使兼侍讀衛國

公食邑一萬五千戶食實封四千五百戶史

浩加食邑一千戶食實封四百戶制

九月二十六日

門下若昔昭陵創新儀而合饗有懷杜衍用舊相以陪
祠雖一時辭疾以莫來然累聖循規而罔墜嘉予元老
軼乃前聞茲惟邦國之華豈獨搢紳之美恩章所厚寵
教當先具官吏浩寬裕敏明粹夷莊重甘盤舊學早翼
戴於潛藩方叔壯猷再弼諧於鼎路正發舒於賢業旋
避遠於事權密勿經惟從容賜第人推高於彥俊予簡
在於耆儒屬先甲之肇裡總前驅而領使駿奔於廟無
跛倚之容山立於庭有肅雝之色茲告成於熙事宜均

賦於腴田於戲祉錫一卣名虎時承於周命侯封萬戶
張良終在於漢京蓋厚下者上之仁而愛君者臣之誼
永綏鴻施日告嘉謨可

少保寧武軍節度使充醴泉觀使信安郡開國

公食邑三千八百戶食實封一千六百戶曾

覲加食邑七百戶食實封三百戶制

九月二十
六日

門下朕率朝紳而款清廟備法駕而登總章棪杪再重
次帷宮而肅若經涂九軌行玉輅以安然旋觀周道之

砥平喜見漢官之儀盛言念初潛之舊實宣使領之勞
顯布綸言誕敷祭福具官曾覲宇量寬博材資肅良保
躬存劼毖之心衛上體忠純之度閱巾箱而考古夷雅
自將執皮帛以會朝寅恭匪懈屬宗祈之協吉躬裸獻
以告虔一純二精既內殫於誠意千乘萬騎亦外展於
侵威紛祝嘏之告祥知乾坤之饗德是廣配天之澤載
推加地之恩於獻祀文王於明堂方祗念儀刑之典授
武帝之神筴敢獨當贊饗之辭有嘉耆艾之臣均昇神

明之況往膺徽數益勉令猷可

安德軍節度使開府儀同三司充萬壽觀使天

水郡開國公食邑三千一百戶食實封八百

戶趙伯圭加食邑七百戶食實封三百戶制九

月二十六日

門下朕荷高厚顧臨之久念祖宗開創之艱稽世室之前規講季秋之大報酌於王爵質固異於陶匏敷以純筵禮亦殊於蒲韎既情文之具舉宜幽顯之來歆眷念

宗盟分頒祭澤具官趙伯圭襟靈粹遠識量寬洪璧琮
溫潤以無瑕鐘呂鏗鏘而有度鎮臨近輔昔高牧御之
才顧燕殊庭今嗜詩書之樂適拜熙成之况思形廣愛
之風越增衍於土田示登昭於物采於戲周邦助祭固
無同姓之皆來漢室侍祠亦有列侯之不至必親以脰
膳之賜庸餐夫骨肉之恩永孚於休毋替朕命可

保信軍節度使開府儀同三司充萬壽觀使榮

國公食邑

闕千闕

百戶食實封

闕千闕

百戶

鄭藻加食邑五百戶食實封三百戶制九月

二十六日

門下朕博考儒先之議精禋王者之堂天地祖宗潔牲
牢而合饗輝胞閭翟徹祭俎以均頒矧予戚畹之英入
護禁庭之重可無懋賞以獎賢勞具官鄭藻蘊質端良
存心樂易襲后家之冑緒開朝著之典章三事班聯謙
抑思同於韋布萬鍾賦祿清修恥溺於膏粱天固畀之
吉康人咸推其耆舊茲卜吉辛之旦肇脩大祀之儀清

廟宿齋外集譽髦之士皇居留衛內資信謹之臣逮拜
況於三靈特申榮於多戶於戲賜齊侯之昨著在春秋
錫申伯之田見於雅什蓋異姓謂之伯舅而大封賚於
善人祇服寵光永綏壽嘏可

定江軍節度使侍衛親軍步軍都指揮使興州
駐劄御前諸軍都統制兼知興州軍州事兼
管内勸農使充和州西路安撫使馬步軍都
總管武功郡開國公食邑闕千闕百戶食實

封闕千闕百戶吳挺加食邑五百戶食實封

二百戶制

九月二十七日

門下朕因秋成物法古彛儀白牡駢犧祀總章之右个
文茵暢轍懷油幕之中權錫以命書協於慶典具官吳
挺材推沉毅識達變通為圻父之爪牙名高宿衛上金
城之方畧威鎮羗戎惟師律之允臧由家聲之善繼屬
類帝禋宗之盛嘉牧人御衆之勞况厥貢之充庭知乃
心之存闕策勛念遠拓地申恩於戲天武地文方並修

於戎祀參旗井鉞尚益固於封陞勉荷殊休務堅壯志
可

慶遠軍節度使提舉江州太平興國宮武功郡

開國公食邑

闕千闕

百戶食實封

闕千闕

百

戶成閔加食邑五百戶食實封二百戶制九

月二十七日

門下朕命駕神宮鳴鑾御道戎容視漢主纛稍於金吾
儀物從周交旂常於玉輅俶拜堪興之况載興鼙鼓之

思具官成閔器質沉雄材資敏銳夙講明於軍志深練
達於武經久護殿巖嘗專閫制弨弓掛壁雖自適於安
閒賜節在門亦坐膺於榮寵屬受釐於宣室方霈澤於
綿區曾是將臣可無餽惠既益戶封之數仍豐幹食之
輸於戲靡愛斯牲神我聽而有慶使羞其行福汝錫以
無忘往服恩章尚思報効可

皇叔祖保康軍節度使提舉佑神觀天水郡開

國公食邑

闕

千

闕

百戶食實封

闕

千

闕

百戶

士歆加食邑五百戶食實封二百戶制

九月

二十七日

門下朕齋精浹日獻饗九筵誠意上孚霽秋霖於俄頃
景光下燭澄浩月於通宵克迓殊休聿哀近屬具官士
歆性資夷曠業履溫純位不期驕籍甚宗盟之譽富而
好禮穆然朝會之容比稽用於陟丈嘗進加於寵數遙
臨外鎮有華杞邑之戈恪奉內祠載揖浮邱之袂逮陪
宗祀思廣惠心斥采邑之爰田衍真畬之幹食以昭邦

錫以侈宗強於戲對越兩儀德方侔乎覆載念茲烈祖
思敢後於本支體予睦族之仁謹爾修身之度可

昭慶軍節度使致仕武功郡開國公食邑闕千

闕百戶食實封闕千闕百戶劉懋加食邑五

百戶食實封二百戶制九月二十七日

門下祀神所以報本貴老所以廣恩漢唐以還饗帝必
嚴于烈祖商周而上省方先見于高年茲竣事於堂筵肆
均釐於耆舊具官劉懋受才庸敏毓性寬和聯戚里之

光榮被慈皇之眷簡清風雅志久還宏景之衣冠黃髮
秀眉幾類武公之年數安車甚適舊節故存雖莫預於
奉璋顧豈忘於賜胙戶封彌廣圭食加多用侈閤休且
綏遐福於戲祭統之倫有十蓋辨親疎達尊之道有三
亦先爵齒欽承駿惠永保期頤可

推誠順化功臣靜海軍節度使觀察處置等使
特進檢校太尉兼御史大夫上柱國安南國
王食邑三千戶食實封一千戶李龍翰加食

邑一千戶食實封四百戶仍兼秉信功臣制

九月二十九日

門下朕觀象房心按圖景已裸行於廟想烈聖之來歆
煙燎於庭恍高靈之下墜逮克綏於遐福庸均賚於遠
邦具官李龍翰世蹈忠純躬行信義聳威聲於南裔嚮
德化於中朝述職貢琛志弗渝於金石疏封燾社誓益
保於山河屬脩禋祀之儀思廣穹祇之況加田衍食益
號褒功因收御之有初示眷私之無數於戲崇周筵於

五室既闡彌文式湯命於九圍是恢鴻施往欽徽數勉
迪順猷可

懷遠軍節度使琳州管內觀察處置等使金紫

光祿大夫檢校司徒使持節琳州諸軍事琳


州刺史兼御史大夫上柱國閣婆國王食邑

一萬二千四百戶食實封五千戶悉里地茶

蘭固野加食邑五百戶食實封二百戶制九

月二十九日

門下朕荷三靈之孚佑撫九有以圖寧本原造化之功
恪思崇報參酌古今之制肅展親祠茲拜況於綏章肆
均休於蕃服具官悉里地茶蘭固野性資明果氣略沉
雄世祚海隅克固封疆之守心存魏闕不忘忠義之圖
屬予饗天假廟之時想爾望日瞻雲之志用推慶祉遠
達惠心載加奉邑之田仍衍真畜之賦於戲降百祥於
上帝敢懷專鄉之祈朝四塞於明堂彌愧咸賓之德懋
膺洪渥永戴清時可



文忠集卷一百三